



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 24
Disyembre 21, 2008
www.philippinerevolution.net

Editorial

Labing inutil nga "pagpalawig" sa CARP

Paltik ang Comprehensive Agrarian Reform Program (CARP). Sa 20 tuig nga pagpatuman sini, nagapabilin nga konsentrado ang malapad nga kadutaan sa kamot sang pila lamang. Ginahatagan-dalan sini indi ang pagpahilway sa masang mangu-nguma, kundi ang labi pa nga rekonsentrasyon sang pagpanag-iya sa duta sa kamot sang mga daan kag bag-o nga daku nga agalon nga mayduta.

Labi pa sini nga igo lubong ang mga mangunguma sa kaimulon kag pagkau-lipon bunga sang ginatib-ong man sini nga maki-imperyalistang liberalisasyon sa agrikultura. Labi pa nga nagbuy-unan ang mga nagahari sa Malacañang sa pagpangurakot sa pondo sang CARP.

Wala sang napuslan ang masang mangunguma sa CARP sa bilog nga panahon nga pagpatuman sini. Labi nga wala sila sang mapuslan sa pagpalawig sini sang anum pa ka bulan. Wala sang iban nga katuyuan ang Kongreso sa pagpalawig sini kundi nga siputon ang nabilin pa sini nga pondo nga nakatalana sa kuno mga "serbisyo pang-agrikultura."

Tuman kadaku nga katontohan ang resolusyon sang Kongreso nga yadto lamang mga kadutaan nga boluntaryo igapaidalum sang mga asendero sa CARP ang pagasakupon sang pagpalawig sini. Lubusan nga ginlibre na sa CARP ang daku nga asendero nga nagapa-

malabag magpasakup diri. Nanguna sa pagduso sang labi pa nga pagkapon sa CARP ang kongresista nga anak ni Gloria Arroyo nga si Mikey. Pinakatuyo sang Malacañang nga ilibre sa CARP ang malagpad nga tubuhan sang mga Arroyo sa Negros nga plano nila nga gamiton sa paghimo sang *bio-ethanol*. Bunga sini, lauman nga pagadagsaon ang Department of Agrarian Reform sang mga aplikasyon para sa *land-use conversion* kag

iban pa nga rason para makalikaw man



**Mga tampok sa
isyu nga ini...**

**Kampanyang kontra-
cha-cha, nagasulong**
PAHINA 4

**Rehimeng Arroyo,
ginhusgahan sg UNHRC**
PAHINA 7

**Untat-lupok sining
Paskua, gindeklara
sg PKP**
PAHINA 11

ang ila mga kadutaan sa CARP.

Nagapalapta sang ilusyon ang mga repormista sang ginapamilit nila ang "pagpalawig sang CARP nga may mga reporma." Ginapasa nila ang masang mangunguma nga may benepisyo ukon katubusan pa sila nga makuha sa napamatud-an na nga paltik kag maki-asendero nga CARP, kag idul-ong ang katubusan nga ini sang isa ka Kongreso nga ginabug-usan sa kadam-an sang daku nga agalon nga mayduta.

Ang matuod nga nahibal-an sang mga progresibong representante nga nagaduso sang tuhay nga Genuine Agrarian Reform Bill (GARB). Lain sa CARP, ginainsister sang GARB ang libre nga pagpagnagtag sang duta. Lain man sa CARP, may mga probisyon ang GARB para siguruhon nga indi madula sa mga mangunguma ang ila duta kag indi na ini maagaw liwat sang daku nga agalon nga mayduta.

Kon wala sang paglaum ang pagreporma sa paltik na gani nga CARP, labi nga mabudlay pa nga lauman nga maaprubahan ang GARB sang isa ka kamara nga pugad sang mga asendero. Ang kadalagan sa pagduso sang GARB wala


naghalin sa pagpasar sini, kundi sa pagpresentar sini sa malapad nga publiko sang mabaskog nga demanda sang sahing mangunguma para sa duta nga matalauma, kag sa pagkastigo sa pyudal kag malapyudal nga pagpang-ulipon sa kaumahan. Ginabuyagyag sini ang kontra-mangunguma kag kontra-pumuluyong lehislatura kag ang garuk nga reaksyunaryo nga nagaharing estado kag sistema sa pungsod.

Ang problema sang mga mangunguma sa duta amo ang mayor nga kaundan sang demokratikong rebolusyon sang banwa. Sa mga lugar sa kaumahan kon sa diin nakatanum na kag nagasulong ang bag-o nga demokratikong rebolusyonaryong kahublagan, ang rebolusyonaryong agraryo hulu-halintang nga ginapatuman katuwang sa paglunsar sang armadong paghimakas kag pagpalig-on sang rebolusyonaryong gahum. Amat-amat nga ginaguba sang mga ini ang

reaksyunaryong gahum sang mga sahing daku nga agalon nga mayduta kag kaalyado sini nga iban pa nga nagaharing sahi, kag kabaylo ang ginatukod nga demokratikong gahum sang pumuluyo.

Sa panugod ginapatuman ang minimum nga programa sang rebolusyonaryong agraryo. Sangkap sini ang pagpanubo sang arkila sa duta, pagdula sang usura, pagpataas sang suhol sang mga mamumugon sa uma, matarung nga pagpataas sang presyo sang mga produkto sang mga mangunguma, pagtukod sang mga simpleng porma sang kooperatiba kag pagpataas sa produktidad sang mga mangunguma. Sa mga lugar nga mas abante na ang rebolusyonaryong kahublagan kag labi nga maluya na ang armadong pwersa sang kaaway sa malapad nga lugar, mahimo man nga ipatuman tubtub sa masarangan nga lebel ang maksimum nga programa sang rebolusyonaryong agraryo. Ginalakipan ini sang kumpiskasyon sang mga kadutaan sang mga masupog nga agalon nga mayduta kag mga duta nga ginabandonar na sang daku nga agalon nga mayduta, nasyunalisasyon sang mga kadutaan nga ini kag paghatag sang kinamatarung sa mga mangunguma nga wala ukon kulang ang duta nga matalauma ini.

Sa mga lugar nga nagaani na sang mga kadalagan ang rebolusyonaryong agraryo kag bag-o nga demokratikong rebolusyon, ang pagdula sa pyudalismo kag malapyudalismo indi paltik nga handum kundi kongkreto nga kadalagan sang rebolusyonaryong paghimakas sang masang mangunguma. Dalayon nga magatapos ang pyudal kag malapyudal nga pagpang-ulipon sa lubos nga pagdaog sang bag-o nga demokratikong rebolusyon.



<p>ANG Bayan</p> <p>Tuig XXXIX No. 24 Disyembre 21, 2008</p> <p>Ang <i>Ang Bayan</i> ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> <p>Mahimo ini i-download halin sa <i>Philippine Revolution Web Central</i> nga makit-an sa:</p> <p>www.philippinerevolution.org</p> <p>Nagabaton ang <i>Ang Bayan</i> sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> <p>Malab-ot kami paagi sa e-mail sa: angbayan@yahoo.com</p>	<p>Kaundan</p> <table> <tr> <td>Inutil ang pagpalawig sg CARP</td><td>1</td></tr> <tr> <td>Rekonsentrasyon sg duta sa CV</td><td>3</td></tr> <tr> <td>Pagpang-agaw sg duta</td><td>3</td></tr> <tr> <td>Kampanyang kontra-chacha</td><td>4</td></tr> <tr> <td>OBL sa Quezon</td><td>6</td></tr> <tr> <td>Arroyo, ginhusgahan sg UNHRC</td><td>7</td></tr> <tr> <td>Proposal para sa tawhanong-kinamatarung</td><td>8</td></tr> <tr> <td>Balita nga pangtawhanong-kinamatarung</td><td>9</td></tr> <tr> <td>Sugilanon pangkalinungan</td><td>10</td></tr> <tr> <td>Untat-lupok sa Paskua</td><td>11</td></tr> <tr> <td>Mga aksyong-militar sg BHB</td><td>12</td></tr> <tr> <td>Mga opensiba sg MILF</td><td>13</td></tr> <tr> <td>Balita</td><td>13</td></tr> </table>	Inutil ang pagpalawig sg CARP	1	Rekonsentrasyon sg duta sa CV	3	Pagpang-agaw sg duta	3	Kampanyang kontra-chacha	4	OBL sa Quezon	6	Arroyo, ginhusgahan sg UNHRC	7	Proposal para sa tawhanong-kinamatarung	8	Balita nga pangtawhanong-kinamatarung	9	Sugilanon pangkalinungan	10	Untat-lupok sa Paskua	11	Mga aksyong-militar sg BHB	12	Mga opensiba sg MILF	13	Balita	13
Inutil ang pagpalawig sg CARP	1																										
Rekonsentrasyon sg duta sa CV	3																										
Pagpang-agaw sg duta	3																										
Kampanyang kontra-chacha	4																										
OBL sa Quezon	6																										
Arroyo, ginhusgahan sg UNHRC	7																										
Proposal para sa tawhanong-kinamatarung	8																										
Balita nga pangtawhanong-kinamatarung	9																										
Sugilanon pangkalinungan	10																										
Untat-lupok sa Paskua	11																										
Mga aksyong-militar sg BHB	12																										
Mga opensiba sg MILF	13																										
Balita	13																										
<p>Ang <i>Ang Bayan</i> ginabantala duha ka beses kada bulan sang Komite Sentral sang Partido Komunista sang Pilipinas</p>																											

Rekonsentrasyon sang duta sa Cagayan Valley

Nagalala ang amat-amat nga rekonsentrasyon sang mga duta sa kamot sang mga bag-ong tipo sang agalon nga mayduta sa Cagayan Valley. Ginahunos ang mga lupa sang mga mangunguma ukon indi gani naobligar sila magbaligya sini bangud indi na nila mabayaran ang ila nga gin-utang.

Nagapinalumba sa pagpang-agaw sang mga duta ang mga daku nga usurero-komersyante, kag pati ang mga magagmay nga nagapautang nga kadam-an mga garantor sa mga baryo. Ang mga usurero-komersyante amo ang nagapalapnag sang mga tanum nga nakasalig sa abono kag pestisidyo, nagapanukot sang mataas nga renta sa duta kag *input* sa pagpanguma samtang ginapabilin nga manubo ang presyo sang mga produkto.

Labi nga ginapabug-at sang gagmay nga usurero nga ginatigla-

was sang mga garantor sa baryo (masami manggaranon nga mangunguma kag pila ka mataas nga nahanunga) ang pautang paagi sang pagpatong nga 5-15% kada tig-talanum kag pagpataw sang *compounded interest* (buot hambalon, ang pagkuenta sang kabilugan nga utang nga ginabase sa gintingub nga balor sang prinsipal kag interes nga wala pa nabayaran). Obligado man sila sa garantor nga magpalinas kag magpahakot sang produkto, kag magtrabaho sa kadutaan sang garantor.

Bunga sini, masami nga ginabutong ang duta lunsay sang mga nahanunga kag imol nga mangunguma. Kadungan ini sang paghunosa sang kadutaan sang mga nakapaidalum sadto sa PD 27, CARP, kag programa nga *stewardship* sang reaksyunaryong gubyerno. Sa Isabela, padayon nga ginabawi ang CLOA (Certificate of Land Ownership Award) sang mga mangunguma sa 13,085-ektarya nga Hacienda San Antonio-Santa Isabel. Gintakda ini sadtong 2007 para hatagan-dalan ang proyekto sang San Miguel Corporation nga pagpananum sang balinghoy.

Matambok nga duta sa pagbato sang mangunguma ang mga proyekto sang gubyerno kag kahimbon nila nga matakaw kag mapanghimulos. Nagapadayon ang pagbato sang masang mangunguma sa Cagayan Valley agud ipamilit ang kinamatarung sa duta nga ginapangabuhi. **AB**

Pagpang-agaw sang duta

Labi nga nagalala ang pagpang-agaw sang lupa sang mga mangunguma sa Cagayan Valley bunga sang pinakabag-o nga mga kontra-pumuluyo nga proyekto sang gubyerno kag dumuluong nga korporasyon.

Proyekto nga agribisnes kag pagmina. Sa prubinsya sang Isabela, temporaryo nga nauntat ang pagpatanom sang balinghoy bangud sa mabaskog nga pagpamatuk sang pumuluyo. Apang may igabulos naman nga proyekto nga may katuwang nga pagpang-agaw sang lupa sang mga mangunguma.


Sa San Mariano, magapatanom sang tubo ang Green Future Innovations, Inc., isa ka kumpanya nga Pilipino kag Hapon nga naganupaktura sang *ethanol*. Sakupon sini ang 6,000 tubtob 35,000 ektarya nga kadutaan sa mga barangay sang Panninan, Binatug, Alibadabad, Dipusu kag Libertad. Pila na ka dekada nga ginauma sang

mga mangunguma ang ginahambal sang gubyerno nga "bakante" nga kadutaan nga pagatamnan sang tubo. Nagahana man nga tamnan sang tubo ang mga barangay nga sakop sang mga banwa sang Ilagan kag Benito Soliven. Sa indi magdugay, target sang Green Future In-

novations, Inc. nga tukuron ang isa ka *distillery plant* sini sa Barangay Alibadabad.

Sa prubinsya sang Cagayan, sa mga banwa sang Gattaran kag Alacapan una nga nagpatanom sang tubo sa mga mangunguma sa idalom sang *contract-farming* sang Pampanga Industrial Park Inc. Pagagamiton ang tubo bilang hilaw nga material sa produksyon sang *ethanol*.

Samtang, sa nabagatnan Isabela kag prubinsya sang Quirino, ginaduso sang mga lokal nga gubyerno ang pagpatanom sang ba-



linghoy. Ginapasulod nila ini sa gagmayan nga sakop nga mga lupa, kag dason magtukod sang mga kooperatiba. Gin-umpisahan na sa banwa sang San Guillermo, sa pagpanguna nanday Rep. Faustino "Bojie" Dy III kag Mayor Edgar Guyud ang pagtukod sang isa ka kooperatiba. Ginakampanya naman ni Mayor Virgilio Padilla sang San Agustin ang pagtanom sang balinghoy sa pila ka baryo sa banwa nila, amo man ni Gob. Dakila "Dax" Cua sa Quirino.

Ginatos ka libo nga ektaryas man ang gin-agaw nga lupa sang mga kumpanya sa pagmina. Sa Isabela pa lang, nagasakop ang mga aplikasyon sa pagmina sang 45,151 ektaryas nga pat-ud nga makaapekto sa pangabuhian sang linibo nga pumuluyo nga Isabelino.

Ginahimo man subong ang pagmina sa bilog nga naaminhan sang Cagayan (halin sa banwa sang Sta. Ana tubtub Claveria). Bangud sa konstruksyon sang *pier* sa Sta. Ana sa idalom sang Cagayan Export Zone Authority sang pamilya nga Enrile, labi pa nga naglapad ang *quarrying operations* nga nagasamad sa mga kadutaan nga ginakabuhi sang mga mangu-nguma. Sa ginatukod man nga airport sa nasambit nga banwa, pililit nga ginabakal ang mga ulumhan sang mangunguma sa kantidad nga P11,000 kada ektarya.

"Proyekto nga para sa kauswagan" sang gubyrno. Padayon man nga ginaduso nga mapatuman sa rehiyon ang kuno mga proyekto nga para sa kauswagan nga makasamad sa naturalisa kag halit sa linibo nga pumuluyo.

Sa Isabela, mapalayas ang isa ka bilog nga komunidad sang mga Agta sa pagatukuron nga dam sa San Mariano. Madamo man ang matabog nga pamilya sa pagtukod sang *hydroelectric plant* sa Pared River, Baggao, Cagayan. **AB**

Kampanya kontra "cha-cha," nagasulong

Naglab-ot sa 15,000 pumuluyo halin sa nagkalain-lain nga sektor ang nagtambong sadtong Disyembre 12 sa malaparan nga rali kontra sa cha-cha sa Makati City. Masobra 70 organisasyon, partido kag personahe ang nagpartisipar sa rali ang nagpahayag sang kolektibo nga sentimyento sang banwa: "Tama na, Punggan na si Gloria, Tapuson na ang cha-cha."

Nagtipon sa rali ang mga representante sang simbahan Katoliko kag iban pa nga relihiyoso nga organisasyon pareho sang El Shaddai kag Jesus Is Lord Movement kag dalagku nga negosyante, mga partido pulitikal, mga demokratiko kag progresibo nga sektor. Mangin ang duha nga kilala nga konserbatibo nga arsobispo nga sanday Gaudencio Cardinal Rosales sang Manila kag Ricardo Cardinal Vidal sang Cebu nagpahayag man sang pagpamatuk sa padihot nga cha-cha ni Arroyo.

Pang-umpisa nga paglupok sang kaakig sang banwa ang natabo nga aksyon-protesta sa Makati. Ginapanan-aw nga magadaku, magalapad kag magasingki pa ang mga protesta sa masunod nga mga simana sa desperado nga pagpamilit sang pamilya nga Arroyo kag mga suluguon nila nga bag-uhon ang sandigan nga layi para lang makapabilin sa poder.

Sa sobra nga kahadlok sa mga

paghulag sang pumuluyo, gintawag sang Malacañang sa pungsudnon nga kabisera ang linibo nga mga pwersa nga pangseguridad halin sa Ilocos, Cagayan Valley, Central Luzon, Southern Luzon kag Bicol. Bisperas pa lang sang natalana nga paghulag sa Makati bantay-sarado na ang Malacañang. Pagkaaga, alas-8 sang aga gindeploy na ang 4,700 tropa sang pulis sa Metro Manila maluwat pa sa nakaistambay nga dugang nga 3,000 pwersang sang pulis kag militar halin sa mga rehiyon kag NCR Command.

Ginreklamo sang Bagong Alyan sang Makabayan (BAYAN) ang harasment nga ginhimo sang mga pulis para punggan ukon maataras ang pagpasakup sang pumuluyo sa aksyon protesta sa Makati. Ginaresto sang mga pulis sa Cubao, Quezon City ang mga aktibista nga katapo sang Muslim-Christian Alliance samtang nagmartsa ang mga ini pakadto sa Makati. Ginharang man



nila sa North Luzon Expressway (NLEX) ang isa ka bus halin sa Bataan. Kalakip sa mga nakasakay diri ang mga pwersa nanday Bishop Socrates Villegas. Mas temprano pa diri gintilawan nga pungan sang Special Action Force (SAF) nga makasulod sa Manila ang delegasyon nanday Fr. Joe Dizon sang Solidarity Philippines nga naghalin pa sa Cavite.

Nagpalapta man sang saywar ang Malacañang nga dapat kuno bantayan sang mga aktibista ang ila kubay bangud may ara kuno nga nakuha nga plano nga isabotahe ini. May ginpalapta man nga estorya nga likidahon ang sin-o man nga personahe nga may plano magkandidato sa pagkapresidente nga magatambong sa natalana nga rali.

Samtang, ang pag-atras-abante subong sang nagkalain-lain nga personahe sa nagahari nga paksyon bahin sa “con-ass” maugat sa ila kahadlok sa nagadaku nga kusog sang pumuluyo kontra sa padihot nga palawigon pa ang paghari ni Arroyo.

Isa ka adlaw pagkatapos ilunsar ang rali sa Makati City, nagpahayag si Majority Floor Leader Arthur Defensor, isa sa mga pangunahong lider sang nagaharing koalisyon Lakas-CMD, nga buy-an na nila kuno ang “con-ass”. Nagpasar naman ang Senado sang resolusyon kontra sa “con-ass” kag ginpirmahan ini sang 23 ka senador, kalakip si Senate President Juan Ponce Enrile, isa ka masupog nga alyado ni Arroyo.

Temporaryo nga gin-untat ang mga debate bahin sa cha-cha sa Kongreso apang determinado ang mga suluguon ni Arroyo nga ipadayon ini sa Enero kon sa diin ginalauman nila nga maghupa na kuno ang kaakig sang pumuluyo.

Sala ang haumhaum sang paksyon Arroyo. Sigurado nga sumalangon sang dugang pa nga mga protesta ang pagpadayon sang ila mga padihot para palawigon ang paguyat ni Arroyo sa gahum. **AB**

Mga paghulag sa mga rehiyon

Lakip sa malaparan nga kampanya kontra sa chacha ang nagkalain-lain pa nga paghulag nga ginlunsar sa Metro Manila kag mga prubinsya sining ikaduha nga simana sang Disyembre.

Disyembre 12. Sa Manila, antes ilunsar ang daku nga rali sa Makati City nga ginpamunuan ni Mayor Alfredo Lim sadtong aga ang isa pa ka rali kontra cha-cha sa monumento ni Andres Bonifacio sa Liwasang Bonifacio. Gintambungan ini sang ginatos nga mga manunudlo kag mga empleyado sang Manila City Hall. Nagpartisipar man ang mga estudyante halin sa mga unibersidad sa Maynila.

Sa Southern Tagalog (ST), naglunsar sang koordinado nga *noise barrage* kag iban pa nga mga aksyong masa ang BAYAN-ST. Dulungan nga protesta ang ginlunsar sa Los Baños, Calamba City, Lucena City kag Batangas City. Sa Cavite, gin-abangan sang mga pulis ang 200 katapo sang mga organisasyon nga kontra cha-cha.

Sa Panay, ginhimo ang tatlo ka minutos nga dulungan nga pagbusina sang mga katapo sang Pinag-isang Samahan ng mga Tsuper at Operator Nationwide (PISTON) antes gin-umpisahan ang martsa sang koalisyon sang “Stop Gloria’s Cha-cha Now” sa Iloilo City. Gintambungan ini sang 1,500 katawo lakip si Archbishop Angel Lagdameo sang Jaro kag nagapamuno sang Catholic Bishops Conference of the Philippines.

Sa Negros, gin-estorya ni Mike Velarde, lider sang El Shaddai, ang pila ka kongresman kag iban pa nga mga upisyal sang lokal nga gubyrno nga indi pagsuportahan ang plano nga pagbag-o sang konstitusyon.

Disyembre 10. Gindungan sang Kilusang Mayo Uno (KMU) kag iban pa nga progresibo nga

organisasyon ang mabaskog nga pagpamatuk sa cha-cha sa ila nga pagdumdum sang Pangkalibutanon nga Adlaw sang Tawhanon nga Kinamatarung sa Metro Manila, Baguio, Central Luzon, Southern Tagalog, Bicol, Panay, Cebu, Davao kag Cagayan de Oro.

Sa Negros Occidental, lima ka adlaw nga nagmartsa halin Disyembre 5 ang masobra 1,000 mamumugon kag mangunguma halin Escalante City pakadto Bacolod City. Suno sa National Federation of Sugar Workers-Food and General Trades (NFSW-FGT), ang ila 95.6-kilometro nga lakbayan amo ang ekspresyon sang ila kabuhikamatayon nga paghimakas para sa lupa, sweldo, tawhanon nga kinamatarung kag kontra sa cha-cha. Nag-abot sila sa Bacolod Public Plaza sadtong Disyembre 9 sang gab-i kag nag-upod sa linibo nga nagtambong sa *interfaith rally* nga ginpartisipahan man ni Bishop Vicente Navarra sang Diocese of Bacolod.

Sa Negros Oriental, ginpamatu-kan man sang Kapunungan Alang sa Ugma sa Gagmay nga Mag-uuma sa Oriental Negros ang plano nga palawigon pa ang paghari sang rehimeng US-Arroyo. Kadungan sini, ginaduso nila ang pagsumiter sang Genuine Agrarian Reform Bill kag mabaskog nga ginkundenar ang mga kaso sang pagpang-abuso militar sa prubinsya.

Disyembre 9. Ginpangunahan sang Gabriela ang pagmartsa sang mga nanay, dala ang ila mga anak, pakadto sa bilding sang Batasang Pambansa sa Quezon City para pamatukan ang cha-cha. **AB**

Napaslawan ang OBL2 sa Quezon

Daku nga kabutigan ang ginapabugal sang AFP sadtong katapusan sang 2007 nga nawasak na kuno sang Oplan Bantay Laya 2 (OBL2) ang mga prenteng gerilya sa Quezon. Ang matuod amo nga napaslawan OBL2 sa Quezon. Madasig nga nagsanto ang mga rebolusyonaryo nga pwera sa prubinsya sa ginpasingki nga pagpanalakay sang kaaway. Sa kadam-an, nagmadinalag-on ang BHB indi lang sa pagpreserba sa kaugalingon, kundi sa padayon nga pagsulong sang mga rebolusyonaryo nga hilikuton.

Pagtadlong kag pagsanto. Una nga ginpamatukan sang Partido kag pamunuan sang BHB ang nangin huyog sa konserbatismo militar sa pag-atubang sa OBL2. Sa pila ka prente, nagpang-alang-alang sa umpisa ang mga kaupod sa paglunsar sang mga opensiba sa pagkabalaka nga balusan sang kaaway ang masa. Napamatud-an ini nga sala sang makita nila nga ginpintasan sang kaaway ang masa bisan wala sila nagalunsar sang mga taktikal nga opensiba.

Ang matuod, nahimo nga libre nga pintasan sang kaaway ang masa kon wala sila ginabira kag napaatras sang hangaway sang banwa. Sugod diri, ginpapagsik sang hangaway sang banwa ang paglunsar sang mga taktikal nga opensiba para paluyahon kag silutan ang kaaway sa pagpamigos sa pumuluyo, pangapinan ang mga sibilyan kag paslawon ang

OBL2.

Sa pagpapagsik sang pagbato sa OBL2, madinalag-on man nga ginpamatukan ang huyog “gerilyaismo” kon sa diin gintugyan sa taga-tag-sa nga diskarte sang mga indibidwal nga iskwad sang BHB ang pagbato sa OBL2. Ginkay-o ang koordinasyon kag pagplano halin lebel-rehiyon tubtub lebel-platun para epektibo nga makasanto ang lebel-dibisyon nga pormasyon kag plano sang kaaway sa bilog nga rehiyon. Sa pagkoordinar sa iban nga mga prente kag bilog rehiyon, nalunsar ang mas sistematiko kag epektibo nga mga pagbira sa kaaway.

Epektibo nga pagbato sang BHB. Pangunahon nga nangin pamaagi sang hangaway sang banwa sa pag-atubang sa OBL2 ang pagkambyo sang mga tum-ok sa hilikuton kag lugar nga konsentran. Kaangut sa estratehiya nga *win-*

hold-win kag estilo nga *focus-and-contain* sang kaaway, tubtub 12 barangay lamang sa kada prenteng gerilya ang masarangan saklawon sang kaaway sa sulod sang tatlo tubtob anom ka bulan. Natumod kag

ginhingalitan sang hangaway sang banwa ang amo nga bulnerabilidad sang kaaway. Ginpauswag sang BHB ang rebolusyonaryong hilikuton sa mga lugar nga wala sang presensya ang kaaway kag nakalunsar sang mga taktikal nga opensiba sa mahina kag nahamulag nga yunit sang AFP.

Samtang, nangin matinugahon kag pleksible ang BHB para mapadayon ang pila ka hilikuton bisan sa mga lugar nga ginadagsa sang kaaway. Sa bulig sang masa, nagapabilin nga bulag kag bungol ang kaaway sa presensya sang hangaway sang banwa. Nakabase pa gihapon ang mga yunit sang hangaway bisan sa mga baryo nga ginakampuhan kag ginalabugay sang kaaway. Diri malapit nga ginaobserbahan sang mga Pulang hangaway ang hulag sang kaaway.

Maisog nga pagbato sang pumuluyo. Ang mataas nga rebolusyonaryo kag mapang-away nga diwa sang mga organisasyong masa ang yabi sa pag-atipan kag pagseguro sa seguridad sang hangaway sang banwa. Sa atubang sang mabaskog nga kalakasan, tortyur kag pagpangipit sang kaaway, labi nga nangin hugot ang pag-atipan kag mainit ang suporta sang masa sa ila mga hangaway. Kon may kaaway, ginainakop kag ginatago sang masa ang mga kaupod. Sa atubang sang pagpang-atake sang kaaway, ginapangिता sang masa ang presensya, proteksyon kag laygay sang ila hangaway.

Wala sila madala sang pagpangtiplang kag kon anu-ano nga padihot sang kaaway. Ginasakyan nila ang mga pagtukod sang mga *bogus* nga kooperatiba, paghiwat sang mga hampang kag pagsalu-salo. Apang paghalin sang kaaway, ila ginapadayon ang tunay nga mapuslanon nga mga programa sang ila rebolusyonaryong kahublagan.

Nagapadayon ang pagpatapu sang bag-o nga mga hangaway sa BHB sa pihak sang pagpamahug





sang kaaway. Wala naubusan ang mga organisasyong masa sang mga ginarekomendar sa ila hangaway. Ang kapintas mismo sang OBL2 ang nagatulod sa mas madamu nga pumuluyo nga magpatapu sa hangaway. Mapagsik ang paghulag sang milisya sang pumuluyo kag ang iban hugot nga katuwang sa mga taktikal nga opensiba sang BHB. Ang mga tagabaryo nga ginainitan sang kaaway ginainakup sang hangaway sang banwa.

Bangud sa kabudlayan nga naganan sang masa sa kasingkion sang mga operasyon militar sang kaaway, hugot nila nga ginapanngayo sa BHB nga pabayaron ang mga berdugo paagi sa paglunsar sang mga taktikal nga opensiba batuk sa mga ini. Napadaug ang mga taktikal nga opensiba nga ini sa hugot nga bulig sang masa.

Samtang, paghalin sang kaaway madasig kag epektibo man nga ginakay-o sang rebolusyonaryong kahublagan ang mga gamo kag kalainan nga ginbilin sang AFP sa mga lugar nga ginpunduhan sang kaaway. Halimbawa sini ang malain nga bisyo kag mga krimen pareho sang pagpanakaw sang kalabaw, pagpanakaw kag pagduso sang droga nga gindula na sang rebolusyonaryong kahublagan paagi sa rebolusyonaryo nga edukasyon sa pumuluyo. Liwat nga ginhimo ang rebolusyonaryong edukasyon para kumbinsihon ang pag-untat sang mga bisyo kag pag-engganyo sa mga nalulong diri nga magpartisipar sa mga rebolusyonaryong programa. Gilayon man nga ginyutralisa ang mga natumod nga kabahin sang lambat-paniktik sang kaaway.

Ang kadasig sang paglubad sa amo nga mga problema pamatuod man sang kadalom sang pagkapundar kag sa lebel nga nalab-ot sang rebolusyonaryo nga kahublagan sa lugar.

AB

Rehimeng Arroyo, ginhusgahan sang UNHRC

Ginhusgahan sini lang sang United Nations Human Rights Committee (UNHRC) ang rehimeng Arroyo sang pagsala sa pagkamatay nanday Eden Marcellana kag Eddie Gumanoy sadtong 2003. Ginkastigo man sang UNHRC ang rehimeng Arroyo sa indi sini pag-aksyon para mahatagan sang kalubaran ang krimen. Ang UNHRC ang ahensya sang United Nations nga nagasubaybay sa pagsunod sang mga pungsod sa International Covenant on Civil and Political Rights (ICCPR).

Ginpasaka sang mga pamilya nanday Marcellana kag Gumanoy ang kaso sa UN sadtong Marso 2006. Si Marcellana ang pangkabilugan nga sekretaryo sang Karapatan sa Southern Tagalog kag si Eddie Gumanoy naman ang pangulo sang Katipunan ng mga Samahang Magbubukid sa Nabagatnan Katagalugan (KASAMATK) sang sila kag tatlo pa nila ka kaupdanang gindukot sang mga tinawo sang sadto Maj. Jovito Palparan sang 204th Bde sa Naujan, Oriental Mindoro sadtong Abril 21, 2003. Ara sila bilang mga myembro sang isa ka *fact-finding team* para usisaon ang mga pahayag bahin sa paglapas sa tawhanon nga kinamatarung kangut sang malaparan nga operasyon militar sa mga banwa sang Gloria kag Pinamalaman. Nasapwan ang ila mga bangkay pagkaaga sa banwa sang Bansud. Pagkatapos pabudlayan, ang tatlo pa nila ka kaupdanang ginbilin nga nakagapos sa banwa sang Bongabon.


Siling sang UNHRC, sa kaso nanday Marcellana kag Gumanoy ginlapas sang gubernong Arroyo ang

tatlo ka artikulo sang ICCPR- ang kinamatarung nga mabuhi, kinamatarung nga mangin hilway kag libre kag kinamatarung sang mga biktima sang paglapas nga mahatagan sang hustisya.

Ang husga sang UN nasanto sa pagdumdum sang International Day for the Elimination of Violence Against Women sadtong Nobyembre 25. Suno sa KARAPATAN, sa 28 manugsakdag sang tawhanon nga kinamatarung nga ginpatay sa idalom sang rehimeng Arroyo, anom ang babaye, upod sini si Marcellana. May ara man nga 107 babaye nga biktima sang ekstrahudisyal nga pagpamatay kag 31 babaye nga biktima sang pagdukot umpisa Enero 2001 tubtob Septyembre 2008.

Samtang, isa ang Southern Tagalog sa mga nasentruhan sang mga paglapas sa tawhanon nga kinamatarung sa idalom ni Arroyo. Suno sa KARAPATAN, mayorya sang 927 babaye nga biktima sang ekstrahudisyal nga pagpamatay umpisa Enero 2001 tubtob 2007 biktima sang pagdukot umpisa 2001 tubtub sa subong naghalin sa Southern Tagalog. Nalista naman sang Cavite Ecumenical Movement for Justice and

Peace ang 298 kaso sang paglapas sa mga kinamatarung sa pulitika, ekonomya kag sibil sa Southern Tagalog sa una nga anum ka bulan pa lamang sang 2008, kon sa diin 29,352 ang nangin biktima.





Baynte diri mga kaso sang pagpatay kag pagdukot.

Ang subong nga pangkabilugan nga sekretaryo sang Karapatan-ST nga si Doris Cuario ginlalagas man subong sang rehimeneng Arroyo. Isa si Cuario sa 72 lider-masa kag aktibista sang Southern Tagalog nga akusado sa himu-himo nga kaso sang pagpatay kaangot sang isa ka taktikal nga opensiba sang Bagong Hangaway ang Banwa sadtong Marso 2006 sa Puerto Galera, Mindoro Oriental kon sa diin duha ka pulis ang napatay. Upod man sa 72 akusado si Orly Marcellana, byudo ni Eden kag subong pangulo sang KASAMATK kag pangkabilugan nga sekretaryo sang BAYAN-Southern Tagalog. Umpisa sadtong Nobyembre anom na sa mga akusado ang nadetenir.

Mga paglapas sa iban pa nga rehiyon. Sa Eastern Visayas, ginkundenar ni Atty. Kathrina Castillo, pangkabilugan nga sekretaryo sang Katungod-Sinirangan Bisayas ang reaksyonaryong militar bilang nagapanguna nga naglapas sa tawhanon nga kinamatarung sa rehiyon. Siling niya, ang AFP ang sa likod sang tanan sang 123 paglapas sa tawhanon nga kinamatarung sa Eastern Visayas umpisa Enero tubtob Oktubre 2008. Kalakip diri ang lima ka kaso sang ekstrahudisyal nga pagpamatay.

Sa Bicol, nagalab-ot na sa 171 ang numero sang mga biktima sang ekstrahudisyal nga pagpamatay umpisa 2001 tubtub Nobyembre 2008, suno kay Ricardo Responde, tagapamaba sang Bayan Muna sa rehiyon.

Sa Western Mindanao, ginkundenar sang Union of People's Lawyers in Mindanao (UPLM) ang mga pagpamahog sa kabuhi

Protektahan ang mga tagapangapin sang tawhanong-kinamatarung!

Ginpresentar sang anom ka progresibo nga kongresista ang isa nga ginapropener nga layi nga nagatalana sang mga kinamatarung kag responsibilidad sang mga tagasakdag sang tawhanong kinamatarung kag mga silot sa mga ahente sang estado nga nagalapas sa mga kinamatarung nga ini.

Ang House Bill 5600 (HB 5600) ginpresentar sadtong Disyembre 10. Ginhandang ina nanday Rep. Satur Ocampo kag Teodoro Casiño sang Bayan Muna, Rafael Mariano sang Anakpawis, Liza Maza kag Luzviminda Ilagan sang Gabriela Women's Party kag Lorenzo Tañada III sang Liberal Party.

Ginpaathag nila nga kinahanglan gid sang ini nga layi bangud sa madamo na sang mga paglapas sa tawhanong-kinamatarung sang mga "*human rights defenders*." Gintumod nila ang mga kaso nanday Eden Marcellana, Eddie Gumanoy, Leima Fortu kag Benjaline Hernandez nga pareho nga brutal nga ginpatay. Tatlo man ang gindukot kag wala pa nasapwan; pito ang gintuyo nga patyon, siyam ang iligal nga ginaresto kag walo ang iligal nga ginpriso. Pila ka napulo sa ila nga kubay ang ginbakol, gintortur, ginpintasan, ginbastos kag ginpakahuy-an, ginpaandaman, ginharas kag ginpahog. Wala pa sang nasilutan sa mga kriminal.

Ginadumilian sa ginapropener

ang pagbansag sang malain sa mga tagasakdag sang tawhanon nga kinamatarung, pagpaniid sa ila, pagpaandam kag pagpamahog. Ang paghatag sang mga pahayag nga paborable sa mga ginasuspetsahan nga naglapas sa tawhanong-kinamatarung kag nakapalain sa mga biktima ginakilala nga katumbas sang paghatag sang mga mando sa mga suspek. Ang pagbalibad nga maghatag sang kopya sang anuman nga kinahanglanon nga dokumento sa korte nga nagabista sang kaso sang paglapas sa tawhanon nga kinamatarung ibutang nga nagapamatuod sa akusasyon nga gusto pamatud-an paagi sa dokumento nga ini.

Indi mahimo nga gamiton ang "*pungsudnon nga seguridad*" kag "*executive privilege*" bilang depensa sa paglapas sa kinamatarung sang mga "*human rights defenders*." Ang sin-o man nga maglapas sa mga probisyon sang ginapropener pagapanaogan sang silot 10-17 tuig nga pagbilanggo kag ukon multa nga P100,000. AB

ni Atty. Emiliano Deleverio, ikaduha nga pangulo sang UPLM kag aktibo nga tagasakdag sang mga tawhanon nga kinamatarung. Nakabaton si Deleverio sang mga mensahe sa *text* nga nagasiling sa iya nga maghalong sa iya mga ginahimo bangud masyado kuno siya nga nagustuhan sang mga tagabukid, pahibalo nga pabor siya sa Bagong Hangaway sang Banwa.

Si Deleverio ang isa sa mga abugado nga nag-uyat sa pinakauna nga madinalag-on nga petisyon para sa *writ of amparo* bahin sa pagdukot sa aktibista sang simbahan kag organisador sang Bayan Muna na si Ruel Munasque sa Dumalinao, Zamboanga del Sur sadtong Oktubre 2007. Siya man ang abugado ni Angelina Bisuna-Ipong, kilala nga detenido pulitikal sa Western Mindanao. AB



Food blockade, ginapanaog sang AFP sa Surigao del Sur

ISA ka *food blockade* ang ginapanaog subong sang 401st Bde sang Philippine Army sa mga sibilyan sa mga mabukid nga baryo sang mga banwa sang Lianga kag San Agustin sa Surigao del Sur. Ginapunggan man ang pagsulod kag pagguwa sang mga sibilyan sa nasambit nga lugar. Suno sa mga report madamu na nga sibilyan ang gin-aresto kag gin-imbestigahan sang militar angot sang sunud-sunod nga madinalag-on nga mga taktikal nga opensiba sang BHB sa Lianga. Madamu man nga mangunguma ang napilitan nga magbakwet bangud sa pagpamahug sang AFP.

Piket sa Nestle, ginbungkag

BRUTAL nga ginbungkag sang mga pulis ang piket sang mga naga-protesta nga mamumugon sa pabrika sang Nestle Philippines sa Cabuyao, Laguna sadtong Disyembre 11.

Ginpakamalaut sang Union of Filipino Employees (UFE) sang Nestle Philippines sa isa ka *indignation rally* ang mapintas nga paglusob sang 100 elemento sang Calabarzon Regional Mobile Group kag Cabuyao PNP kag ang pag-aresto kay Noel Alemania, 43, bise-presidente sang UFE-Nestle Philippines kag pangkabilugan nga sekretaryo sang Pagkakaisa ng mga Manggagawa sa Timog Katagalugan (PAMANTIK).

Ginpasakaan sang *alarm and scandal* (pagpanggamu kag pag-iskandalo) kag iban pa nga kaso ang lider-obraero sa Biñan Regional Trial Court.

Ginlunsar sang mga mamumugon ang ila piket para ipamilit ang mandu sang Department of Labor sadtong Nobyembre 28 nga magbalik na sa negosasyon ang unyon kag ang maneydsment para makahimo sang *collective bargaining agreement* (CBA).

Sibilyan, ginluthang sang suldado

ISA ka sibilyan ang napatay kag duha ang nararong sang wala patugsiling nga nagpangluthang sang isa ka suldado sa Antique. Ang napatay amo si Francisco Tacorda, taga-Barangay Cabladan, Sibalom, Antique samtang ang mga nararong amo sanday Apolonio Prado kag Barangay Kagawad Elmer Batiles sang Tubudan, San Remigio, Antique. Naigo ang mga sibilyan sang basta na lang palukpan ni Pfc Jerry Davila sang iya M16 sadtong pista sang Barangay Aningalan sa San Remigio sadtong Disyembre 6.

Mabaskog nga ginkundenar sang Napoleon Tumagtang Command sang Bag-ong Hangaway sang Banwa sa Southern Panay ang 31st Division Reconnaissance Company kag ang Philippine Army bangud sa pagbalewala sang mga nagapamuno nga upisyal sini sa krimen.

Responsable man ang 31st DRC sa pagpangluthang sa mga sibilyan sadtong Mayo 2006 sa Barangay Panpanan II, San Remigio nga ginkamatay ni Epifania Cabaya, 65, kag pagkararong sang 13 niya ka pamilya, kalakip ang duha ka bata.

Paglapas sa kinamatarung sang mga bata sa Samar

GINKUNDENAR sang Efren Martires Command (BHB-Eastern Visayas) ang binutig nga pahayag sang Office of the Presidential Adviser on the Peace Process nga nagagamit kuno ang BHB sang mga bata nga hangaway kag ginabutang sila sa dilikado nga kahimtangan kada may inaway. Siling sang kumand, ginatahod sang BHB ang pisikal kag moral nga kaayuhan sang mga bata santo sa mga rebolusyonaryong prinsipyo, mga probisyon sang Comprehensive Agreement on Respect for Human Rights and International Humanitarian Law kag iban pa nga pangkalibutanon nga layi kag talaksan.

Ang rehimeng Arroyo kag militar sini ang pinakagrabe nga nagalapas sa kinamatarung sang mga bata sa armado nga banggianay, siling sini. Masami ginaharas kag ginatortur sang mga soldado ang mga bata kag pamatan-on sa kaumhan kag pilit nga ginahimo nga giya sa mga operasyon militar. Gintumod nga mga halimbawa sanday Jino, 13 kag Lino de la Cruz, 11 nga ginpin-tasan, ginpahog kag ginpilit sang mga tropa sang 63rd IB nga maggiya sa ila operasyon militar sa Barangay Carolina, Matuguinao, Samar sadtong Hulyo 7. Sadtong Septyembre 13 naman, ginpangluthang sang mga tropa sang 46th IB ang magpakaisa nga sanday JR, 12, Barton, 13, kag Ronie, 21 sa Barangay Bay-ang, San Jorge, Samar. Napatay sa pagpangluthang si Ronie, utod ni JR. Ginsunog sang mga soldado ang iya bangkay kag gingamit sa paggiya sang naghugpa nga *helicopter* ang aso halin diri. Ginatos man nga bata ang nagaantos sa pagpangbomba sang militar sa ila mga komunidad kag sa malaparan nga pagbakwit sang mga sibilyan sa tatlo ka probinsya sang isla sang Samar bangud sa ginpasingki nga mga operasyon militar sa idalom sang Oplan Bantay Laya 2.

Wala interes si Arroyo sa sugilanon pangkalinungan

Wala sang ginapakita nga interes ang rehimeng US-Arroyo nga malab-ot ang pangmalawigan nga kalinungan sa pakignegosasyon sini sa National Democratic Front of the Philippines (NDFP). Ginalapakan sini ang mga nagligad nga kasugtanan kag ginasadang ang kundisyon para mapadayon ang proseso nga pangkalinungan.

Ginagamit lamang sang Guberno sang Republika sang Pilipinas (GRP) ang sugilanon pangkalinungan para masiod ang NDFP sa paon sang isa ka wala-kutod nga malawigan nga untat-lupok.

Nagsulod sa impormal nga pagpakigsugilanon ang NDFP sa mga representante sang GRP sadtong ulihi nga simana sang Nobyembre sa tuyo nga buhion liwat ang suspendido nga mga pormal nga pagsugilanon sang GRP-NDFP. Apang napaslawan ini sang pilit himuon nga kundisyon sang GRP ang pagsulod sang NDFP sa isa sang wala-kutod nga pangmalawigan nga untat-lupok. Liw-as ini sa The Hague Joint Declaration nga nagasiling nga wala sang dapat itilana nga kundisyon sa pag-estoryahanay.

Ginbalibaran sang NDFP ang kundisyon nga ini sang GRP. Ang pagsulod sa wala sang limite nga malawigan nga untat-lupok nga wala sang maathag nga pagresolba sang mga halambalanon nga amo ang ugat sang armadong inaway nagakahulugan lang sang pagsurender kag pasipikasyon sang mga rebolusyonaryong pwera. Mangin walapulos ang tanan nga mga nagligad nga kasugtanan kag madiskaril ang anupaman nga mapuslanon nga pagsugilanon sa mga sustantibo nga adyenda para sa mga repormang sosyo-ekonomiko kag pulitikal.

Suno kay Ka Fidel Agcaoili, tagapamuno sang NDFP Human Rights Committee kag tagapamaba sang NDFP Negotiating Panel, "Ang matuod kag maitom nga katuyuan sang

hubon nga Arroyo-Ermita-Gonzales amo nga patyon ang sugilanon pangkalinungan kag itransporma lamang ini bilang negosasyon para sa untat-lupok kag pagsurender sang NDFP kag sang pumuluyong Pilipino nga nagakinahanglan kag nagaduso sang mga basehang reporma."

Malawig na nga ginabastos sang rehimen nga US-Arroyo ang sugilanon pangkalinungan. Umpisa pa sadtong 2004, nagabalibad na ang Malacañang nga sundon ang mga nakasugtan nga obligasyon sini nga iduso ang pagkuha sang PKP, sang BHB kag kay Kaupod Jose Ma. "Joema" Sison sa listahan sang mga "terroristang organisasyon" sang US. Sadtong 2007, kakunsabo ang mga ahensya pangseguridad sang US kag pulisya nga Dutch, gintinguhaan pa sang GRP nga paluhuron ang NDFP

paagi sa pagpasaka sang himu-himo nga kaso batuk kay Ka Joema sa The Netherlands nga nagresulta sa pagkaaresto kag 17 ka adlaw nga detensyon niya didto.

Sa pagpapanaog sang kondisyon sa pag-estoryahanay, ginlapas sang GRP ang The Hague Joint Declaration of 1992 nga nagatalana sang mga prinsipyo kag

mangin dalagan sang pag-estoryahanay. Sa wala sang untat nga paglapak sa mga tawhanon nga kinamatarung kag pagtarget sa partikular sang mga konsultant sang NDFP, ginalapak sang GRP ang Joint Agreement on Safety and Immunity Guarantees (nga nagagarantiya sang proteksyon sa mga konsultant kag istap sang magtimbang nga bahin) kag ang Comprehensive Agreement on Respect for Human Rights and International Humanitarian Law (nga nagaobligar sa magtimbang nga bahin nga respetuhon ang mga tawhanong-kinamatarung sang pumuluyo nga Pilipino).

Sa atubang sang padayon nga pagpakatig-a sang GRP sa pasistang adyenda sini sa sugilanon pangkalinungan, ginbaton sang National Council sang NDFP ang duha ka punto sang rekomendasyon sang NDFP Negotiating Peace Panel:

a) Pagbawi sang NDFP sa daan sini nga tanyag sang temporaryo nga untat-lupok kada may pormal na nga mga pulong ang mga *negotiating panel* bangud ginapagwa ini sang GRP nga palatandaan sang kahandaan sang NDFP nga magsulod sa wala sang kutod nga untat-lupok sang wala pa sang desaysibo nga resolusyon sa mga halambalanon pangkatilingban, pang-ekonomiya kag pangpulitika.

b) Pagbali-bad sang NDFP nga magsulod sa anumang klase sang pagpakig-estorya sa GRP nga wala sang maathag nga adyenda kag daloy sang pag-estoryahanay. Ini para pungan ang GRP nga bastuson ang The Hague Joint Declaration kag ang Agreement on Reciprocal Working Committees nga nagatalana sang adyenda kag daloy sang pag-estoryahanay: una, mga reporma nga pangkati-



lingban kag pang-ekonomya; ikaduha, mga reporma nga pangpulitika kag konstitusyunal; kag katapusan, ang pag-untat sang banggi-anay kag pagkay-o sa dispusisyon sang mga pwera.

Sa pagduso sang US kag mga pasistang upisyal, malawig na nga gusto tapuson sang GRP ang sugilanon pangkalinungan sini sa NDFP. Apang gusto sini nga ibasol sa NDFP ang pagbagsak sang sugilanon pangkalinungan. Napaslawan ang GRP sa bagay nga ini bangud sa maukod nga pagtinguha sang NDFP nga mapadayon pa gihapon ang hambalanay sa basehan sang nauna na nga mga kasugtanan, sa waay kataka nga pagpaathag sang NDFP sang makatarungan nga bahin sini kag sa pagbuyagyag sang kabutigan kag malisyoso nga paon sang GRP.

Samtang labi nga nagalutaw na ang subong nga rehimeng US-Arroyo wala sang interes sa pagpadayon sang sugilanon pangkalinungan, nakahanda ang NDFP nga hulation na lang ang masunod nga administrasyon sang GRP. **AB**

Untat-lupok sining Paskua, gindeklarar sang PKP

Igapatuman ang lima ka adlaw nga *unilateral* nga untat-lupok sang tanan nga yunit sang Bag-ong Hangaway sang Banwa (BHB) halin Disyembre 24 asta 26 kag Disyembre 31 asta Enero 1, 2009, suno sa Kawanihan sa Impormasyon sang Partido Komunista Pilipinas (PKP). Ang pag-obserba sang untat lupok, suno sa direktiba sang Komite Sentral sang Partido sadtong Disyembre 19, pagrespeto sa tradisyon sang paskua sang pumulyong Pilipino. Dugang diri, magahatag-dalan man ang okasyon nga ini sa pagsaulog sang mga pagtilipon sang pumulyo sa sobra 100 larangan gerilya halin naaminhan asta nabagatnan sang pungsod para isaulog ang ika-40 anibersaryo sang liwat nga pagkatukod sang PKP sa Disyembre 26, 2008.

Amo man ginapahanumdum sang Komite Sentral sang Partido ang BHB nga mangin alerto batuk sa ginalauman nga pagtraidor sang rehimen US-Arroyo kag mga pasistang armadong tropa. Bisan pa may nauna na nga gindeklara nga *suspension of offensive military operation* (SOMO) ang AFP, nagaserbi nga komoplahe lamang sa pagpaniktik sang militar sa hulag sang masa kag mga rebolusyonaryo nga pwera sa mga lugar nga pagahiwatan sang mga selebrasyon sang anibersaryo sang Partido. **AB**

Ginabutang sa peligro sang AFP ang mga bihag-sang-gera

Ginpakamalaut sang Bag-ong Hangaway sang Banwa-Southern Mindanao Region (BHB-SMR) si Jesus Dureza, Press Secretary sang Malacañang sang gin-anunsyo niya sadtong Disyembre 11 nga indi pag-untatan sang militar ang mga operasyon sini sa Davao Oriental sa baylo nga mackignegosasyon para sa libre nga paghilway sa duha ka bihag-sang-gera nga sa pag-atipan subong sang BHB.

Sandig sa mando sang Malacañang kag sang mga upisyal sang Armed Forces of the Philippines (AFP), masobra 4,000 tropa sang militar ukon walo ka batalyon sang AFP ang nagasuyod sa bilog nga Southern Mindanao sa wala-pulos nga tuyo "luwason" ang duha ka bihag-sang-gera. Ini sa pihak sang mabaskog nga ginapangayo sang duha ka bihag sa subong nga uyat sang BHB sa rehiyon nga untaton ang mga operasyon militar para mapadali ang paghilway sa ila.

Ang pagbalibad nga ipaagi sa

negosasyon ang paghilway sa duha ka bihag nagapakita nga indi interesado ang rehimeng Arroyo sa kaayuhan sang duha nila ka upisyal. Mas importante sa ila ang matabunan ang kahuy-anan sang AFP kag PNP sa sunod-sunod nga mga kadalang-an sang BHB sa rehiyon.

Antes ini, ginpagwa sang BHB-SMR ang isa ka *video clip* nga naggaunod sang pahayag ni PO3 Eduardo Tumol sadtong Disyembre 8. Sa nasambit nga bidyo, ginapangayo ni Tumol sa mga upisyal sang PNP kag AFP nga temporaryo untaton ang mga operasyon militar sa

Davao Oriental. Ini ang magahatag sang dalan para sa maayo kag libre nga paghilway sa iya kag iya upod nga bihag-sang-gera nga si 1Lt. Vicente Cammayo.

Kadungan sini, nagsulat ang National Democratic Front-SMR sa mga asawa nanday Tumol kag Cammayo para ipaabot nga libre ang ila mga bana kag ginaseguro ang ila mga kinamatarung. Ginpaathag sini ang proseso nga ginaagyan subong sang ila mga bana bilang mga upisyal sang mga espesyal nga yunit sang AFP kag PNP. Bangud sa ila tindog sa pamunuan, direkta ang ila salabton sa mga operasyon nga nagtuga sang mga paglapas sa tawhanon nga kinamatarung sa madamo nga sibilyan sa mga lugar kon sa diin sila naasayn. Ang mga paglapas nga ini maid-id nga ginaimbestiga kag ginatun-an subong sang rebolusyonaryo nga hukmanan. Ang mga resulta sini ipahibalo sa publiko. **AB**



Mga aksyon militar sang BHB

Pila ka mga aksyon militar ang ginlunsar sang Bag-ong Hangaway sang Banwa (BHB) sa Mindanao, Bicol, Panay kag Mindoro bag-o matapos ang tuig.

Disyembre 18. Isa ka elemento sang CAFGU ang napatay kag duha pa ka iban ang napilasan sang salakayon sang mga Pulang hangaway bandang 10:30 sang aga ang detatsment sang CAFGU sa Paquibato District, Davao City.

Disyembre 15, kaagahon. Wala sang nahimo ang mga elemento sang 58th IB kag Special Civilian Armed Auxiliary (SCAA) sang sunugon sang BHB ang *heavy equipment* sang Surigao Development Corp. (Sudecor). Silot ini sa Sudecor sa pagkalbo sini sa katalunan sang Surigao del Sur, indi makatarungan nga pagtrato sini sa mga mamumugon sini kag pang-abuso sang 58th IB-SCAA sa mga lumad kag mangunguma sa lugar.

Disyembre 14. Isa ka suldado nga kabahin sang 23rd Military Intelligence Company (MICO) ang napatay sang lambatan siya sang BHB sa isla sang Mindoro.

Natabo ang ambus bandang alas 2:30 sang hapon samtang nagapaniktik ang militar sa Barangay Santa Teresita, Mansalay, Mindoro Oriental.

Nagtuyo nga mag-ayuda ang isa ka upisyal sang Philippine National Police (PNP) sang Mansalay pero ginbalabagan siya kag dinisarmahan sang mga Pulang hangaway.

Sa Agusan del Sur, isa ka elemento sang CAFGU ang napilasan sang isnaypingon sang mga hangaway sang BHB sa Front 14 ang detatsment sang 23rd IB-CAA sa Sityo Masabong, Barangay Bayugan 3, Bunawan.

Disyembre 13. Isa ka suldado

ang napatay kag isa pa ang napilasan sang ambuson sang mga Pulang hangaway ang komboy sang mga suldado sa Barangay San Isidro, Bulan, Sorsogon. Nagapabalik tani ang mga suldado sa ila kampo sang lambatan sila bandang alas 3:30 sang hapon.

Disyembre 11. Lima ka suldado sang 36th IB ang napatay kag madamo nga tropa ang napilasan sang ambuson sang BHB ang isa ka kulom sang yunit militar nga ini nga nagaoperasyon sa *logging area* sa Diatagon, Lianga, Surigao del Sur. Nakakumpiska ang BHB sang isa ka M16 kag lima ka pak. Ang 36th IB kabahin sang pwersang militar nga responsable sa mga pagpatay sang mga inosenteng sibilyan sa Bislig City, Bunawan kag Rosario sa Agusan del Sur. Kahimbong man sang 36th IB ang pila ka upisyal sang lokal nga gubyrno, DENR kag mga *illegal logger* nga responsable sa pagkalbo sang kagulangan sa *Dipterocarp* Forest Research Institute kag *watershed area* sa punsok nga mga banwa sang Bislig-Tagbina-Hinatuan, Agusan del Sur.

Disyembre 9. Nakumpiska sang BHB ang

isa ka *shotgun* sang dis-armahan sini ang mga abusado nga gwardya sa *fishpond* nga ginapanag-iyahan sang mga pamilya Dy Ty Ban kag Libarios sa Barangay Can-aga, Malimono, Surigao del Sur.

Disyembre 8. Duha ka suldado sang 31st DRC (Division Reconnaissance Company) sang Philippine Army ang napilasan sang mangkwentro sang yunit nila sa Barangay Passi, Igaras, Iloilo ang mga Pulang hangaway sang Napoleon Tumagtang Command sang BHB-Southern Iloilo. Wala sang kaswalti kag luwas nga naka-atras ang mga Pulang hangaway pagkatapos sang lima ka minutos nga linupok. Wala sang nahimo ang tatlo ka kulom sang ginapahambog nga mga "pili nga pwersa" sang 3rd Infantry Division o bisan ang duha ka seksyon sang 47th IB nga malapit lamang sa lugar nga natabuan. Gintyempo sa gab-i ang pagpadala sa ospital sang militar sa duha ka pilason nga tropa pero nakita pa gihapon ini sang mga tagagabaryo.

Disyembre 7. Duha ka suldado ang napilasan sang harason sang mga Pulang hangaway sang BHB ang isa ka detatsment sang militar sa Monkayo, Compostela Valley. **AB**



Patong-patong ang kaswalti sang AFP batuk sa MILF-BIAF

Nagadamo ang mga kaswalti sang mga suldado sang Armed Forces of the Philippines (AFP) bunga sang sunod-sunod nga mga engkwentro sa Moro Islamic Liberation Front-Bangsamoro Islamic Armed Forces (MILF-BIAF) sining una nga tunga sang Disyembre. Suno sa pinakaulihi nga mga report, naglab-ot na sa 56 ang napatay nga tropa sang AFP sa mga engkwentro sini sa mga *mujahideen* (ukon hangaway) sang BIAF.

Walo ka suldado ang napatay sang salakayon sang AFP ang kuta sang MILF-BIAF sa Piagapo, Lanao del Sur sadtong Disyembre 16. Duha ka *mujahideen* ang napatay sa masobra siyam ka oras nga engkwentro.

Suno sa MILF, napilitan nga magdependa ang BIAF sang salakayon sang AFP ang isa sini ka yunit sa idalom ni Abdullah Macapaar (Kumander Bravo) sa Piagapo. Duha ang napatay sa militar samtang tatlo ka kaswalti naman ang naagom sang BIAF sa inaway nga nagigrab sa Barangay Bansayan, Piagapo.

Ginlambatan sang mga *mujahideen* sang 102nd Base Command-BIAF ang mga elemento sang AFP sa Barangay Pantaon, Munai, Lanao del Norte bandang alas-11 sang

aga sadtong Disyembre 11. Lima ka suldado sang napatay kag indi ma-isip ang mga napilasan. Nagpaulan sang *mortar* ang mga miltar.

Sadtong Disyembre 9 sang aga, naglab-ot naman sa 43 ka suldado sang 8th Marine Landing Team (8th MLBI) ang napatay sang makaengkwentro sini ang mga hangaway sang First Brigade, 114th Base Command sang MILF-BIAF sa Barangay Kailih, Al Barka, Basilan. Naggamit sang mga *helicopter gunship* ang mga Marine bilang suporta sa ila operasyon nga nag-untat lamang bag-o magdulom. Naghulog sang apat ka bomba ang AFP kag gamay lang maigo ang isa ka *evacuation center*. Pila ka balay man ang gin-sunog sang mga elemento sang 8th MLBT sa Sityo Bakisung sa nasam-bit nga lugar.

AFP ang may kahimuan sa pagpamomba sa Iligan—MILF

MGA ahente militar sang gubyr-nong Arroyo ang may kahimuan sa duha ka pagpalupok sang bomba sa Iligan City sadtong Disyembre 18 nga ginkamatay sang duha katawo kag ginkapilas sang 48, suno sa Moro Islamic Liberation Front (MILF).

Suno sa isa ka pahayag sining Disyembre 20 sa *luwaran*, ang *web-site* sang MILF, nakabaton ang MILF sang "A-1 intelligence report" halin mismo sa Camp Aguinaldo nga ipasibangud ang amo nga mga pagpamomba kanday Kumander Bravo,

Kumander Umbra Kato kag iban pa nga kumander sang MILF. Tuyo sini nga hatagan-rason ang paglunsar sang mas dalagku kag sostenido nga atake batuk sa ila sa 2009. Napinalisa kuno ang nasam-bit nga plano pagkatapos mahatagan ang AFP sang dugang nga badyet kag magatungan ang pagkaakig sang publiko sa MILF bunga sang serye sang pagpamomba sa Mindanao nga lunsay ginapasibangud sa "special operations group" sang MILF kag Jemaah Islamiyah.

Resesyon, magadugay pa sang pila tuig

GIN-AKO sining una nga simana sang Disyembre sa mga upisyal nga datos sang ekonomiya sang US nga nahulog na ini sa resesyon halin pa sadtong Disyembre 2007. Matapos ang 0.5% nga pagkahulog sang ekonomiya sadtong Hunyo-Agosto, ginatantya nga maabot sang 4% ang ginubo sang ekonomiya sang US sining ulihi nga kwarto sang 2008. Ang madugayan nga resesyon o depresyon amo ang kinaiya sang padayon nga pagnubo sang produksyon kag paglala sang disempleyo.

Naglab-ot sa 533,000 mamumugon sa US ang nawad-an sang trabaho sining Nobyembre bunga sang paghina sang manupaktura sa pinakamanubo nga lebel halin sadtong 1982. Nagtaas ang tantos sang disempleyo pakadto sa 6.7% halin 6.5% sadtong Oktubre. Naglab-ot na sang 1.9 milyon ang ginsipa subong nga tuig. Wala ginalauman nga makabawi ang manupaktura asta sa ikaduha nga kwarto sang 2010. Magalubha pa ang tantos sang disempleyo pakadto sa 8.7-9.5% sa masunond nga duha ka tuig.

Ginatay-og sang resesyon ang pangkalibutanon nga sistemang kapitalista. Ang ekonomiya sang Germany, ginataya nga magakitid sang 3% sa 2009, pinakamalubha na halin pagkatapos sang gerang pangkalibutanon. Nagkitid man sang 1.8% ang ekonomiya sang Japan sining ikatlo nga kwarto sang 2008. Sa una nga kahigayunan sining nagligad nga pito ka tuig, nagnubo sang 2.2% ang mga eksport sang China sining Nobyembre bunga sang paghina sang demanda halin sa US. Bunga sini, ginalauman nga padayon nga magatibusok ang manupaktura nga magaresulta sa pagkadula sang minilyon nga trabaho.

Bush, ginhaboy sang sapatos

Wala ginpalamas sang isa ka per-yodistang Iraqi ang kahigayunan agud ipatilaw ang pinakagrabe nga insulto kay Pres. George W. Bush sang US—ang paghaboy sang sapatos. Natabo ini sadtong Disyembre 14 sa isa ka *press conference* sa Baghdad kon sa diin nagpapamulong-pulong sanday Bush kag ang idu-ido sini nga *prime minister* sang Iraq nga si Nuri al-Maliki.

Bag-o pa man makahambal ang duha, ginhaboy ni Mundathar al-Zaide, 28, isa ka reporter sa telebisyon, ang iya duha ka sapatos kay Bush, dungan singgit sang “Hoy ido! Ini ang halok sang paalam sa imo, (*Here’s your goodbye kiss, you dog*) Ini ang balos sang madamo nga balo, mga ilo kag napatay bangud sa imo nga gera.” Sa kulturang Arabo, pinakagrabe nga insulto nga habuyon ukon batuhon sang sapatos kag tawgon nga ido.

Gilayon naman nga gindakop sang mga pulis kag ginhunong si Al-Zaide. Posible nga mabilanggo siya sang apat asta pito ka tuig bangud

sa indi pagrespeto sa isa nga ara sa gahum. Suno sa utod kag abugado sini, gintortur si Al-Zaide kag madamu siya nga lanog sa lawas.

Ginakabig subong nga baganihan sang mga Arabo si Al-Zaide bangud sa ginhimo niya. Adlaw-adlaw ang ila demonstrasyon para ipamilit ang iya kahilwayan. Gintanyagan man siya ni Pres. Hugo Chavez sang Venezuela sang *sanctuary* pananglitan mahilway siya sa bilangguan.

Gloria, hinaboy sang tsinelas.

Samtang, dululungan nga hinaboy sang tsinelas kag sapatos ang laragway ni Gloria Arroyo sa atubang sang upisina sang Department of Foreign Affairs sining Disyembre 18. Pareho sang ginhimo nga paghaboy sang sapatos sa amo sini nga si Bush, ang paghaboy sa laragway ni Arroyo nga kabahin sang protestang ginahiwat sang mga katapu sang Migrante International bilang pagkundera sa pag-abandona sang rehimen sa interes sang mga migrante nga mamumugon.

Ecuador, indi magbayad sang utang

NAGDESIYON sining Disyembre 15 ang gubyrerno sang Ecuador nga indi bayaran ang \$31 milyon interes sa \$3.9 bilyon nga utang sang pungsod sa dumuluong nga bangko. Ginatumod sang gubyrernong Ecuador nga “imoral” ang natumod nga mga utang bangud naumid diri ang mga kaso sang korapsyon.

Ginpaidalom sa pag-awdit ang tanan nga pangpinansya nga transaksyon sang Ecuador sa mga dumuluong nga bangko halin 1976 asta 2006.

Natukiban nga may ara nga mga kriminal nga paglapas ang nagligad nga mga gubyrerno bangud sa pagbaligya sini sang mga utang sa mga *pension funds*, *hedge funds* kag iban pa nga dumuluong nga pangpangapital.

Suno sa gubyrerno diri, wala sang kahilabtanan ang indi pagbayad sang Ecuador sa anuman nga problema sini sa pinansya. May bastante nga kita ang Ecuador halin sa pag-eksport sini sang langis kag masarangan sini nga magbayad sang utang.

Ginasakdag sang Ecuador ang islogan nga “*life before debt*” (kabuhi bag-o utang) nga sinuportahan sang pumuluyong Ecuadorean. Preparado ang pungsod nga atubangon ang anuman nga imbestigasyon kag ang katumbas nga pagbista sa tikang nga ini.

Ini ang ikaduha nga tian nga indi magbayad ang Ecuador sang dumuluong nga utang sa sulod sang isa ka dekada.

Mga pag-alsa, naga-igrab sa Greece

NAGAIGRAB sa lain-lain nga syudad sang Greece ang mga pag-alsa sining ikaduha nga simana sang Disyembre. Nagaserbi nga mitsa diri ang pagkapatay sang mga pulis sa isa ka 16 anyos nga pamatan-on sa Athens sadtong Disyembre 6.

Una nga nag-igrab ang mga pag-alsa sa Exarchia sa Athens, nga masami ginatabuan sang mga engkwentro sang mga pulis kag militante nga mga grupo. Ginatos ka pamatan-on ang naghaboy sang mga *molotov* sa mga istasyon sang pulis, tindahan kag bangko. Mada-sig nga naglapta ang pag-alsa sa masobra 12 pa nga mga syudad. Masobra 200 na nga pamatan-on ang gin-aresto halin sadto.

Indi simple nga reaksiyon sa pagkapatay sang pulis sa isa ka pamatan-on ang umpisa sang mga pag-alsa. Madugay na nga akig katama ang pumuluyong Greek bangud sa sunod-sunod man nga mga iskandalo sa korapsyon nga ginamiran sang matag-as nga upisyal sang gubyrerno, malala nga krisis sa ekonomiya, lapnagon nga disempleyo kag malala nga kriminalidad.

Sang ulihi ang mga pag-alsa naglapnag sa serye sang mga welga at aksyong protesta sang mga estudyante, manunudlo kag mamumugon nga nagapahayag sang ila disgusto sa malala nga krisis ekonomiya kag mga polisiya sang gubyrerno. Ginhingalitan man sang mga lider sang oposisyon ang malaparan nga pag-alsa para iduso ang ila panawagan nga maglunsar sang mas temprano nga eleksyon para islan na ang konserbatibong gubyrerno ni Prime Minister Kostas Karamanlis. Naglunsar man sang demonstrasyon sa lain-lain nga pungsod sa Europe bilang suporta.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 24
Disyembre 21, 2008
www.philippinerevolution.net

Editoryal

Labing inutil nga “pagpalawig” sa CARP

Paltik ang Comprehensive Agrarian Reform Program (CARP). Sa 20 tuig nga pagpatuman sini, nagapabilin nga konsentrado ang malapad nga kadutaan sa kamot sang pila lamang. Ginahatagan-dalan sini indi ang pagpahilway sa masang mangunguma, kundi ang labi pa nga rekonsentrasyon sang pagpanag-iya sa duta sa kamot sang mga daan kag bag-o nga daku nga agalon nga mayduta.


Labi pa sini nga igalubong ang mga mangunguma sa kaimulon kag pagkau-lipon bunga sang ginatib-ong man sini nga maki-imperyalistang liberalisasyon sa agrikultura. Labi pa nga nagbuy-unan ang mga nagahari sa Malacañang sa pagpangurakot sa pondo sang CARP.

Wala sang napuslan ang masang mangunguma sa CARP sa bilog nga panahon nga pagpatuman sini. Labi nga wala sila sang mapuslan sa pagpalawig sini sang anum pa ka bulan. Wala sang iban nga katuyuan ang Kongreso sa pagpalawig sini kundi nga siputon ang nabilin pa sini nga pondo nga nakatalana sa kuno mga “serbisyo pang-agrikultura.”

Tuman kadaku nga katontohan ang resolusyon sang Kongreso nga yadto lamang mga kadutaan nga boluntaryo igapaidalum sang mga asendero sa CARP ang pagasakupon sang pagpalawig sini. Lubusan nga ginlibre na sa CARP ang daku nga asendero nga nagapa-

malabag magpasakup diri. Nanguna sa pagduso sang labi pa nga pagkapon sa CARP ang kongresista nga anak ni Gloria Arroyo nga si Mikey. Pinakatuyo sang Malacañang nga ilibre sa CARP ang malagpad nga tubuhan sang mga Arroyo sa Negros nga plano nila nga gamiton sa paghimo sang *bio-ethanol*. Bunga sini, lauman nga pagadagsaon ang Department of Agrarian Reform sang mga aplikasyon para sa *land-use conversion* kag

iban pa nga
rason para
makali-
kaw man



**Mga tampok sa
isyu nga ini...**

**Kampanyang kontra-
cha-cha, nagasulong**
PAHINA 4

**Rehimeng Arroyo,
ginhusgahan sg UNHRC**
PAHINA 7

**Untat-lupok sining
Paskua, ginadeklara
sg PKP**
PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*